

BARCHASI SHU YERDAN VA SHU ONDAN BOSHLANADI

TA'LIM ZIYOSI

HAQIQIY QADRIYATLAR BAYRAMI

Shu kunlarda mamlakatimiz bo'ylab Navro'z sayillari keng nishonlanmoqda. Universitetning talabalar shaharchasida o'tkazilgan bayram shodiyonalari talaba-

yoshlar uchun unutilmas lahzalarga boy bo'ldi. Ayniqsa, osh musobaqasi va universitet rahbariyatining e'tirofi va e'tibori sayilga shukuh bag'ishladi.

Sumalak pishirish asnosida milliy qadriyat va marosimlar, jumladan, sumalak tayyorlashning qat'iy an'analari asosida ma'lum tartib-qoidalarga amal qilingan holda bajarilishi yoshlarga uqdirildi.

Shuningdek, talaba-qizlar ham sumalak atrofida alyollar va she'riy bayt-baraklar bilan faol ishtirok etdilar. Sumalak muqaddas taom sifatida qadrlanishini o'zlari tug'ilib



o'sgan hududlari misolida tushuntirib berdilar.

"Sumalak sayli" tonggacha davom etib, universitet yotoqxonalariida "bir

UNIVERSITET GAZETASI 3-son

Gazeta ichida gazeta

piyola choy ustida dildan suhbat"ga ulanib ketdi.

Sayilda universitet rektori G'ofurjon Muhamedov ham ishtirok etdi. Universitet rahbari sayil ishtirokchilarini bahoriy bayramlar bilan tabriklab, doshqozonda qaynagan sumalakning o'ziga xos shukhi borligini qayd etdi. Yotoqxonalararo o'tkazilgan turli musobaqalar sayilga ko'tarinki ruh olib kirdi. O'zbekona taom hisoblangan oshning o'zgacha tarzda davraga tortiq etilishi ko'ngillarga xushnudlik olib keldi.

Bayram tadbirini iste'dodli talabalar milliy kuy-qo'shiqlar ijrosi bilan davom ettirishdi.

Navro'z sayli talabalar yodida yaxshi xotiralar bilan saqlanib qolishi, shubhasiz.

Munira BALTAYEVA,
"Chumoli tabalar" media guruhi rahbari



TANQIDIY FIKRLASH – BILIMGA YO'L OCHUVCHI KALIT

Zamonaviy dunyoda ma'lumot oqimi mislsiz tezlik bilan ortib bormoqda. Biz har kuni turli manbalardan axborot qabul qilamiz: internet, ijtimoiy tarmoqlar, televidenie, kitob va gazetalari. Ammo bu axborotning barchasi ham haqiqat emas. Shuning uchun ham har bir inson mustaqil fikrlashni, ma'lumotni tahlil qilishni va xulosalar chiqarishni o'rganishi kerak. Aynan tanqidiy fikrlash shu jarayonda eng asosiy vositalardan biridir. Axborot ilmda "fakt-cheking" degan tushuncha bor. Ya'ni mavjud axborotlarni saralash, solishtirish, uning to'g'riligini, xolisligini tekshirish bugungi kunda muhimdir.

Tanqidiy fikrlash – bu har qanday axborotni sinchkovlik bilan tahlil qilish, asosli dalillarga suyanib, xulosa chiqarish san'atidir. Mashhur faylasuf Rene Dekartning so'zlari bilan aytganda: "Aqlning eng buyuk fazilati – hech narsani shubhasiz qabul qilmaslikdir."

Bugungi kunda dezinformatsiya, yolg'on yangiliklar va noto'g'ri tushunchalar jamiyatga katta ta'sir o'tkazmoqda. Shuning uchun ham har bir inson, ayniqsa, yosh avlod, tanqidiy fikrlashni o'rganishi shart. Bu nafaqat yolg'on axborotni aniqlash, balki mustaqil fikr yuritish va to'g'ri qaror qabul qilish uchun ham zarur.

Ta'lim tizimi insonni faqatgina bilim bilan qurollantirishi emas, balki mustaqil fikrlashga o'rgatishi lozim. O'quvchilar va talabalar o'qituvchining gaplarini shunchaki eshitib, yodlash bilan cheklanmasdan, berilgan ma'lumot ustida o'ylab, uni tahlil qilishlari kerak. Mashhur olim Albert Eynshteyn ta'kidlaganidek: "Maktabning vazifasi – yoshlarni butun hayoti davomida mustaqil fikrlashga o'rgatishdir."

Afsuski, aksariyat ta'lim tizimlarida o'quvchilar o'z fikrlarini bildirishdan ko'ra, tayyor bilimlarni qabul qilishga o'rgatiladi. Holbuki, savol berish, bahslashish, alternativ nuqtai nazarni o'rganish orqali insonning tafakkuri rivojlanadi. Buni chuqur anglagan ta'lim muassasalari interfaol o'qitish metodlariga e'tibor qaratmoqda, bunda muhokamalar, debatlar va tahliliy topshiriqlar asosiy o'rin tutadi.

Zamonaviy dunyoda tanqidiy fikrlash nafaqat ta'lim, balki kundalik hayotda ham muhim rol o'ynaydi. Internetdagi ayrim yolg'on ma'lumotlarga aldanmaslik, reklamalarning ta'siriga tushib qolmaslik, jamiyatdagi muhim masalalar bo'yicha to'g'ri qaror qabul qilish uchun inson tanqidiy fikrlashni o'rganishi shart.

Masalan, ijtimoiy tarmoqlarda tarqalgan ma'lumotni tekshirmasdan baham ko'rish ko'plab noto'g'ri tushunchalarning keng tarqalishiga sabab bo'ladi. Bugungi kunda mediasavodxonlik va tanqidiy fikrlash bir-biri bilan chambarchas bog'liq bo'lib, har bir fuqaroning axborotga ongli yondashishini ta'minlaydi.

Tanqidiy fikrlash – insonni hayot sinovlariga tayyorlaydigan eng muhim qurollardan biridir. U insonni manipulyatsiyalardan himoya qiladi, ilmiy va kundalik muammolarni hal qilishda yordam beradi, shuningdek, insoniyat taraqqiyotiga xizmat qiladi. Shuning uchun ham ta'lim tizimi faqat bilim berish bilan cheklanmasdan, o'quvchilarning mustaqil va tanqidiy fikrlash ko'nikmalarini rivojlantirishga alohida e'tibor qaratishi lozim.

Yodingizda bo'lsin, "Kim ko'p biladi, u hamma narsaga ishonmaydi." – bu haqiqatni tushungan har bir inson to'g'ri xulosa chiqara oladi va hayotda muvaffaqiyat qozonadi!

Hasanjon ABDURAHMONOV,
talaba

yaratish ishlari boshlangan. Ushbu xayrli ishga Chirchiq davlat pedagogika universiteti ham faol hissa qo'shmoqda.

Universitetning Jismoniy madaniyat fakultetida loyiha doirasida «Ziyolilar bog'i» yaratildi.

Mazkur bog' talabalarga va o'qituvchilarga nafaqat dam olish joyi, balki ekologik ongni

Bugungi kunda ekologik muammolarga yechim topish, yashil maydonlarni ko'paytirish va aholining atrof-muhitga nisbatan mas'uliyatini oshirish maqsadida respublika bo'ylab amalga oshirilayotgan "Yashil makon" umummilliy loyihasi doirasida yana bir muhim tashabbus amalga oshirildi. Prezidentimizning

"YASHIL MAKON" UMUMMILLIY LOYIHASI AMALDA



tashabbusi bilan boshlangan ushbu loyiha bugungi kunda universitetlarda ham keng qo'llanilmoqda, uning doirasida bir necha o'quv muassasalarida zamonaviy ekologik bog'lar

shakllantirish, tabiiy go'zallikni saqlash va tabiatni sevishtirish o'rgatish imkonini yaratadi.

– Ushbu boqqa 150 tupga yaqin mevali va manzarali daraxtlar ekildi, – deydi bo'lim rahbari Farhod Ikromov, – Jismoniy madaniyat fakulteti yoshlari ana shu ko'chatlar to'liq o'zini tutishi va ularning parvarishiga mas'ul bo'ladi. Bundan tashqari, bog'da o'tkaziladigan ekologik tadbirlar va seminarlar orqali talabalar tabiatni asrashning zarurligini va ekologik muammolarni hal etish yo'llarini o'rganadilar. Bu bog'ning tashkil etilishi talabalarga tabiatni qadrlash va uning go'zalligini saqlashni o'rgatishda muhim qadam bo'ldi, desak mubolag'a bo'lmaydi.

Maqsadimiz – bu ishlarni nomigagina qilish emas, balki talabalarimiz uchun mazza qilib dam oladigan, kayfiyatini ko'taradigan bog' yaratish.

Farhod IKROMOV

TA'LIM – KELAJAK BESHIGI



Hozirgi kunda ta'lim – jamiyatning asosi va milliy rivojlanishning poydevori. Chirchiq davlat pedagogika universiteti – zamon talabalariga javob beruvchi pedagoglarni tayyorlaydigan, ta'limning yuqori cho'qqisiga intilayotgan yosh avlodning yo'lini ochadigan bilim dargohi hisoblanadi.

Men, Nasiba Sayfudinova mazkur universitetning Gumanitar fakulteti Qozoq tili va adabiyoti mutaxassisligi bo'yicha 3-bosqich talabasiman. Millatim qozoq bo'lgani uchun O'zbekistonda ona tilimda oliy ta'lim olish baxtiga muyassar bo'lganimdan behad baxtiyorman. Bizga yaratilgan imkoniyatlar uchun barcha ta'lim fidoyilariga chuqur minnatdorligimni bildiraman.

TAVSIYA ETILADI

Maxsus pedagogika kafedrası professori Qodirova Feruzaxon Usmanovnaning "Sensor integratsiyada sog'lomlashtiruvchi yondashuvlarning o'rni" mavzusida ochiq ma'ruzasi 2025-yil 26-mart kuni, 1-bino, 420-auditoriyada, soat 10.30 da bo'lib o'tadi.
Murojaat uchun telefon:
+998(97) 548-50-11



Maxsus pedagogika kafedrası dotsent Fayziyeva Ubayda Yunusovnaning "Jarrohlikdan keyingi eshituv nutqiy reabilitatsiya bosqichi va davrlari" mavzusida ochiq ma'ruzasi 2025-yil 8-aprel kuni, 1-bino, 316-auditoriyada, soat 9.00 da bo'lib o'tadi.
Murojaat uchun telefon:
+998(97) 548-50-11

Maxsus pedagogika kafedrası dotsenti Abdullayeva Gavhar Saparovnaning "Патология зрительного анализатора человека" mavzusida ochiq ma'ruzasi 2025-yil 7-aprel kuni, 1-bino, 415-auditoriyada, 2-smena, soat 15.00 da bo'lib o'tadi.
Murojaat uchun telefon:
+998(97) 548-50-11



Maxsus pedagogika kafedrası pedagogika fanlari bo'yicha falsafa doktori Kobilova Shaxnoza Xudayshukurovnaning "Bolaning ruhiy rivojlanishida biologik va ijtimoiy omillarning o'rni" mavzusida ochiq ma'ruzasi 2025-yil 17-aprel kuni, 1-bino, 117-auditoriyada, soat 10.30 da bo'lib o'tadi.
Murojaat uchun telefon:
+998(97) 548-50-11

BAHOR BAYOZI


21-mart – Butunjahon she'riyat kuni

BIZ
KUTGAN
BAHOR

Yangilikka qo'rqmay boqib, tashlab qadam.
Yurtim, jahon minbariga qasring solding.
Insoniylik tuyg'ularin targ'ib etib,
«Yangi O'zbekiston» degan nomni olding!

Bag'ringda ko'p iste'dodli olov yoshlar,
Har sohada bayrog'ingni ko'tarmoqda.
Sportingga tahsin o'qib, to'kib yoshlar,
Turganida shunday she'rlar ko'karmoqda!

Gulnora HIMMATOVA
Gumanitar fanlar fakulteti talabasi



ONA TILIM

Toshlarga bitilgan qadim xotiram,
Qoshg'ariy bobomning ko'nglidagi nur.
Hazrat Navoiydan qolgan xazinam,
Sehrli allangda mujassam mehr.

Ona deb atadim, ey tilim – shonim,
Sening-la tanidim Vatan nomini.
Ezgu fazilatlar, qadriyat – barin,
Buyuk bobolarim shavkat-shonini.

Seni unutganlar – beqadr, beshon,
Zavolga yuz tutar misoli manqurt.
Sen axir millatning cho'ng ildizisan,
Sen borsan, o'zligim bo'lmaydi unut.

Ko'zim qorasida asrayman seni,
Mehringdan qo'r olib, ash'orlar bitgum.
Sen bir nafas bo'lsang – yutmay o'taman.
Sen bor qoyalarni yelkamda tutgum!

Ruxshona RAHMATULLAYEVA
Gumanitar fanlar fakulteti talabasi

YOR RO'MOLI

Qo'llarimda qoldi yorning ro'moli,
Oydan ham go'zaldur husn-u jamoli.
Urmasa bo'ldi-da sevgim uvoli,
Bo'lolmadi yorim nechun vafoli?

O'zga boqqa qo'ndi, oh, nechun uchib,
Men esa qoldimku gulimni quchib.
Gul ham oldi bugun tikonin sanchib,
Esiz, pok sevgimni tashladi yanchib.

Endi yor demoqqa bormikan haqqim,
Qo'llarim yetmadi, yo'q edi naqdim.
So'ndi-da sevgiga bo'lgan bu shahdim,
Tuproqqa ko'mildi yigitlik ahdim.

Bog'dan tanlagandim, gulimni saylab,
Kapalak qo'nardi unga avaylab.
Balki taqdir kuldi bugun ataylab,
Otashin sevgimni tuproqqa joylab.

Qo'llarimda qoldi qizil ro'moli,
Taralar yorimning atrin ifori.
Urmasa bo'lgani sevgim uvoli,
Nechun bo'lolmadi yorim vafoli?

VATAN

Tuprog'i muqaddas, go'zal diyorsan,
Jannatdek yam-yashil ajib makonsan.
Vujudimda oqqan qip-qizil qonsan,
Onam o'zing Vatan, otamsan – Vatan!

Bog'laringda o'sar lola, qizg'aldoq,
Sen doim yuksakka bizdek kulib boq.
Osmoni musaffo ajib diyorsan,
Gullarga burkangan go'zal bo'stonsan!

Amudaryo, Siring to'lib toshadi,
Temur shijoati shunda oshadi.

To'marisning o'chmas izisan Vatan!
Boburlarning ko'rar ko'zisan, Vatan!

Tug'iladi hali qancha Behbudiy,
Yer tarxini chizdi bobom Beruniy.
Ulug'beklar sevgan osmonsan, Vatan,
Ta'rifi tugamas dostonsan, Vatan!

Oq oltin, bug'doying elga mashhurdir,
Marg'ilon adrasi-atlasi mashhur.
Mashhurdir dunyoga Samarqand noning,
Choyini shirin qilgan novvotsan, Vatan!

Xiva, Buxorolar tarixiy shahar,
Islomning markazi tarixdan azal.
Ne-ne imomlarning onasidan sen,
Allohning mehri-yu zikrisan, Vatan!

Osiyo yuragi – O'zbekistonsan,
Jannat tarovati esgan bo'stonsan.
Temurning Vatani ona Turonsan,
O'ziga bek bo'lgan O'zbekistonsan!

Miraziz NARZULLAYEV,
Gumanitar fanlar fakulteti talabasi



Yuragim muzlatib ketgan edi qish,
Bo'roni hayolim uchirgan har yon.
Unutmqlik asli og'ir bir tashvish,
Seni sog'intirib o'tmoqda bahor.

Mayin shabbodasi sochimni silab,
Bodomning g'unchasi holimni so'rab.
Yomg'ir tomchilari ko'p sabr tilab,
Seni sog'intirib o'tmoqda bahor.

Sirimni hech kimga ayta olmayman,
Sog'indim deyish ham qiz bolaga or.
Lek, sensiz yashashga ko'nikolmayman,
Seni sog'intirib o'tmoqda bahor.

Tentirab yuraman, sendadir xayol,
Rasmingga tikilib tunlarim bedor.
Mayli, kel, qiynama shu jonimni ol,
Seni sog'intirib o'tmoqda bahor.

Sog'inch deb atalmish daryo ham to'ldi,
Beg'ubor tuyg'ular chekmoqda ozor.
Seni kutib mana bahor – yoz bo'ldi,
Seni sog'intirib o'tmoqda bahor.

Dilnura ULASHYEVA,
Gumanitar fanlar fakulteti talabasi



SHIR-U SHAKAR
Omad, bahori zebo,
Boychechak ham ochildi,
Bo nasimi diloro,
To'rt tomonga yoyildi,

Fasli beg'ubori sol,
Xohlasang bir umr qol,
Og'o'shat nozanin ast,
Bag'rimning ziyosi bo'l.

Har dam duo mekunam,
Bahor yagona bo'lsin!
Az lazzati shirinash,
Qalbim quvonchga to'lsin!

Nazira ALIQULOVA,
Gumanitar fanlar fakulteti talabasi



Arazlama, noz-u karashmangni qo'y,
Xayolimni yeydi har kun xar hil o'y.
Sabrimni sinama, qo'ygin, pariroy,
Mayli, har kun eslab, yozma uzun xat,
Men tomonga qarab qo'ygin, Muhabbat.

Ketolmayman tashlab, seni yolg'onchim,
Azobingdan jimman, yuragim tilim.
Yagonamsan o'zing, o'zing quvonchim,
Mayli, har kun eslab, yozma uzun xat,
Men tomonga qarab qo'ygin, Muhabbat.

Yurakkinam oshiq bo'ldi so'zingga,
Go'zal qosh-u kiprik hamda ko'zingga.
Meni buncha bog'lab qo'yma o'zinga,
Mayli, har kun eslab yozma uzun xat,
Men tomonga qarab qo'ygin, Muhabbat.

Navro'zbek TOVSHAROV,
Gumanitar fanlar fakulteti talabasi

ONAMNI QARITMA,
DUNYO !

Qora sochi oqqa aylanib,
Qolganini sezmay qolibman.
Vaqt o'tibdi bir-bir shaylanib,
Onam sochiga oq solibman.

Kechagina men bola edim,
Soddagina, beg'ubor ham g'o'r.
Hammadan tez ulg'aysam, derdim,
Dunyo kezsam – bo'lsam zo'r shoir.

Oh sezdimki, onam qaribdi,
Oh ketibdi, ko'zlaridan nur.
Kun botibdi, tong oqaribdi,
Qani endi avvalgi surur?

Sog'inchimdan so'lmasin yuzing,
Meni o'ylab bo'lmagin ado.
Bolalikka chipta oldim men,
Endi uni qaritma, dunyo!

Madina SHAVKATOVA
gumanitar fanlar fakulteti talabasi

TUN YARMIDA

Tun yarmida ko'zlarim ochdim,
Boqar edim shiftga mo'ltirab.
Xayollarim hamon parishon,
Sovuqdanmi, tanam qaltirab.
Gumburlardi momoqaldiroq,
To'fon kabi yomg'ir ovozi.
Ko'ngillarga solardi titroq,
Tabiatning kuylagan "sozi".
Nogoh ko'zim tushdi sandalga,
Onam xira shamning qoshida.
Zo'r-u bazo'r ipni o'tqazar,
Olam-olam o'ylar boshida.
Kech angladim uning qadrini,
Onalar bor – issiq xonalar.
Farzand uchun qancha dardlarni
Yengib yashar bedor onalar.

Bibirobiya NE'MATOVA
gumanitar fanlar fakulteti talabasi

Ushbu qo'shsahifa Chirchiq davlat
pedagogika universitetining
Axborot xizmati
tomonidan tayyorlandi.

YURTIM

Yozay desam, sen haqingda jon Vatanim,
Bisotdan izlab-izlab, so'z topolmayman.
Hayajondan bir qalqidi jon va tanim,
Misra bitib, daftarimni yopolmayman.

Abdulla Oripovdek farzandlaring bor,
Keng olamga sening madhing taratgandi.
«O'zbekiston vatanim» deb mardonavor,
«O'zbekiston» qasidasin yaratgandi.

Zulfiyaga sirdosh bo'lgan qalamim bor,
Unda qancha she'r bitilgan senga yurtim.
Qalam tutgan o'z-o'zimdami alamim bor,
Halimaga izdosh bo'lgum bu kun yurtim...

Bag'ringdaman, jannatmakon mening o'lkam!
Qishloqlaring shaharlardan kammam bugun.
Yodiy – voha birdək go'zal, so'lim, ko'rkam,
Shukur deyman sening qizing bo'lganim-chun.

Yangi nafas urar yuzga har qadamda,
Mudrayotgan qalblar bugun ko'zin ochdi.
G'urur hissi jo'sh uradi har odamda,
Quyosh go'yo yaqinroqdan nurin sochdi.

Nigina BOBOYEVA,
Turizm fakulteti talabasi

